

木秀遭風折、蘭芳遇露萎。千鈞勢易壓、一柱力難支。
騰口因成瘡、吹毛遂得疵。憂來吟貝錦、謫去詠江離。
邂逅塵中遇、殷勤馬上辭。賈生離魏闕、王粲向荆夷。
水過清源寺、山經綺季祠。心搖漢皋珮、淚墮峴亭碑。
驛路緣雲際、城樓枕水湄。思鄉多繞澤、望闕獨登陴。
林晚青蕭索、江平綠渺瀰。野秋鳴蟋蟀、沙冷聚鸕鷀。
官舍黃茅屋、人家苦竹籬。白醪充夜酌、紅粟備晨炊。
寡鶴摧風翻、鰥魚失水髻。閨雛啼渴旦、涼葉墜相思。
一點寒燈滅、三聲曉角吹。藍衫經雨故、驄馬臥霜羸。
念涸誰濡沫、嫌醒自蠶醅。耳垂無伯樂、舌在有張儀。
負氣衝星劍、傾心向日葵。金言自銷鑠、玉性肯磷緇。
伸屈須看蠖、窮通莫問龜。定知身是患、當用道爲醫。
想子今如彼、嗟予獨在斯。無聊當歲杪、有夢到天涯。
坐阻連襟帶、行乖接履綦。潤銷衣上霧、香散室中芝。
念遠緣遷貶、驚時爲別離。素書三往復、明月七盈虧。
舊里非難到、餘歡不可追。樹依興善老、草傍靜安衰。
前事思如昨、中懷寫向誰。北村尋古柏、南宅訪辛夷。
此日空搔首、何人共解頤。病多知夜永、年長覺秋悲。